

**Tasiilami timmisartunut suluusalinnut mittarfissap ingerlatseqatigiiffiup suliassanut ilaaqqullugu Kalaallit Airports A/S-mut nalunaaruteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartuni ilaasortaq Justus Hansen, Demokraatit)

**Akissuteqaat**

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

**Siullermeerneqarnera**

Naalakkersuisut sinnerlugit Inatsisartuni ilaasortaq Justus Hansen Demokraatineersoq aalajangiiffigisassatut siunnersuummik saqqummiussineranut qutsavigaara.

Aallarniutigalugu oqaatigissavara, mittarfiup Tasiilap illoqarfianut qanittumut inissinneqarnerani Justus Hansenip iluaqutissatut isummerfigisaanut Naalakkersuisut isumaqataammata. Tamannattaaq aamma 2015-imi Inatsisartut ukiakkut ataatsimiinneranni Tasiilap mittarfinnut pilersaarutinut ataatsimoortunut ilanngunneqarneranut peqqutaavoq.

Nuummi, Ilulissani Qaqortumilu mittarfiliortiternissat Inatsisartut ukiakkut ataatsimiinneranni 2015-imi aalajangiiffigineqarmatali suliassat taakku nassuiagaalluartut paasinarsivoq, Tasiilaq Ittoqqortoormiillu taamaangitsut. Nuummi, Ilulissani Qaqortumilu suliassanut nalunaarusianik misissueqqaarnernillu arlalinnik suliaqartoqareerpoq. Taamaattumik mittarfiit pingasut taakku aktianik piginneqatigiiffimmut, Namminersorlutik Oqartussanit pigineqartumut, ilaatigut suliassat killiffii annertuumik assigiinngissuteqartut tunngavigalugit tunngavilerneqarnissaat aalajangiunneqarpoq.

Suliat tamarmik siuangaatsiarsimagaluartut, Nuummi, Ilulissani Qaqortumilu suliat Tasiilami Ittoqqortoormiinilu sulianit siuarsimanerupput. Tassalu 2017-imi qaammatit pingasut siulliit ingerlanerini mittarfiit tamarmik Kalaallit Airports A/S-ip ataani sanaartorneqarnissaannut pilersaarusionerqarput. Tasiilami Ittoqqortoormiinilu misissueqqaarnerit siuariaateqarsimagaluartut pilersaarusionerit suli aallartinneqanngillat.

Naalakkersuisut naliliinerat malillugu Tasiilami mittarfiliassap suliarineqarnera Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoqarfiup ataani ingerlanneqarpat, suliap pitsaannerusumik patajaannerusumillu siuartornera ingerlaannassaaq. Taamatuttaaq naliliineq malillugu misissueqqaarnernut pilersaarusionernullu aningaasartuutit Aningaasanut Inatsimmi konto 87.11.09 "Assartuussineq pillugu Isumalioqatigiissitaq – misissueqqaarnerit" aqqutigalugu akilerneqarsinnaassapput, tassani misissueqqaarnernut ukiumut 15 millionit koruunit immikkoortinneqarmata.

Aatsaat misissueqqaarnerit naammassinerini aammalu mittarfiit akissaviisa paasineqarnerini suliassanut aningaasaliissutissanik qinnuteqarnissaq pisariaqarpoq. Aningaasartuutissat suli ilisimaneqanngitsut suliassanut aningaasaliissutissanik qinnuteqarnissaq naapertuutinngilaq. Suliassat naammattumik nassuiarneqareerpata aatsaat suliassap sularineqarnissaanut apeqqutit kiisalu aningaasalersuinissamut apeqqutit eqqortumik isummerfigineqarsinnaassapput.

Tassalu naliliineq malillugu suliassat Kalaallit Airports A/S-imut tunniunneqarnissaat maannarpiaq suliassanik siuariartitsinermik annertunerulersitsisinnaanngilaq.

Taamaattumik aalajangiiffigisassatut siunnersuut itigartinneqassasoq Naalakkersuisunit inassutigineqarpoq.